

Ngwuja'ri ngwanni ngwullu je Yäwüdä Äni kitabanu

Ngwuja'ri ngwee ngwullu je Yäwüdä, ngwullung je ngwe girinya ngworta ngwanni ngwuru ngwu'duru ngwanni ngwaru ngwuru ngwikirijin. Ngwuja'ri ngwee ngwobla goranu ngwullu je Yäwüdä ngwuru nono ngwanni ngwullu je Butruj gi'ra rom. Yäwüdä gwor'temaja ngwüjü ngwanni ngwadi uli ngwuja'ri ngwee ngwüngün “ngwani änni Ngwaalu nunnu ngaa gu etadi 'di'däny, gwanni gwügätijänä Ngwaalu ngwüjü ngwüngün ngwanni ngwuju'ru gwur'tal” (1.3).

Yajang yidi ngwuja'ri

1. Aganni (1.1-2)
2. 'Dürni enggacing gwudi yi'duru (1.3-16)
3. Mätinälü ndi änni Ngwaalu (1.17-23)
4. Ulingani Ngwaalu (1.24-25)

Aganni

¹ Ngwuja'ri ngwee ngwändi 'dünggüny äny gwani Yäwüdä gwuru gwenggen gwudi Yagubinga, äny gwuru dinäd didi Yicu Kirictu. Ngwükäci nje ngwüjü ngwanni ngwännä je Papa gwuru Ngwaalu ngwuje urnidi. Ngwanni ngwo ngwetadu gu Yicu Kirictu.

² Ara je gu inä gwudi Ngwaalu na adatalu na änni ji gwirälü.

Ngwoorta ngwanni ngwuru ngwu'duru

³ Lani ngwumaad ngwüny, äny gwüjädi gu gwulleny nda je üllijä ngwuja'ri ngwee ngwani gilang gwanni gwemadar gu gwüpäng, nyi be o're nyi icinänü ndi ari nga je üllijä nga je päcälü ngwuja'ri ngwe ngwani änni Ngwaalu nunnu ngaa gu etadi 'di'däny, gwanni gwügätijänä Ngwaalu ngwüjü ngwüngün ngwanni ngwuju'ru gwur'tal.

⁴ Ndi ari ngwüji ngwe'te ngwo ngwa'ti gidrü didi Ngwaalu ngwuma ngwe Ngwaalu obalu 'tu'tu gwerre, ngwo ngwuma je äni gidiliganu. Ngwuru ngwüji ngwa'ti äti drü didi Ngwaalu ngwati gwürli ngwuja'ri ngwudi yimi'rü yidi Ngwaalu ngwege aar je aniji gay gidi yidigany aar nyi'rini Delenya dege dipa diru de'te pu dani Yicu Kirictu.

⁵ Ngaa je ni lenge gwele giyee 'dar, nggwubupa ngaa diwayini ndi ari Deleny diru Ngwaalu digilängidiyä ngwüjü ngwüngün ngwuru Yijiräyil ken gani Mijir. A be aji a je yi'rany 'rinnye lanni lima 'ti ännä Ngwaalu. ⁶ Diwayinar 'to yi'rrä yanni yima 'ti mäti ngwaalinga ngwegen aar 'ti indä yeleny ye yanni yätädi je Ngwaalu aar be gatani ngwaalinga ngwegen, yima je Ngwaalu rädä gidirimänü ngwuje gekajalu yu'rung ye yidi gwur'taling giyoo yijica picing yelenya gwudi gomom nggä'di gipa gidi gwodaning.

⁷ Diwayinar 'to ndi ari yiru gu ye'te ye'te nono ngwüjü ngwudi yündär yidi Jaduminga Gamura gwe na yündär yanni yijicidaar ye, ngwur ngwugwurlidalu aar übüji yidiganyanu 'dar. Yiiru yegen yanni yärräär je yiru gora gidi

ngwüji 'dar ngwanni ngwa je yi'rendeny yidi ligä lidi gwur'taling reraji.

⁸ Yiru gu 'to no ngwüji ngwee ngwati je ngwulingid eny aar digang ngwangina ngwegen aar ci yelenyalu mireny aar ari ngwulem ngwüji ngwünäjinä kerala.

⁹ A be deleny didi yi'rr dani Mägäyil anni garnataar dijego'rr de ngwanginu ngwudi Müjä, dima 'ti ädinä ndi ari ngwulem ngwü'ridä dijego'rro ngwuja'ri nono ngwube ci 'dogo, "Aar ang Deleny girinya."

¹⁰ A be ngwüji ngwee ngwuru ngwu'duru aar ondaji yidiganya giyi'ralu 'dar ya'ti aar ye lingidi yorta ye ngwaalinga na yi'ral yilingidäär je aar je übjänü ligor le aar ru nono yoo'ra yubanu ya'ti lingidi. Yi'ral yiru giyee ngwäyälü yanni yati je gäbici aar dudi.

¹¹ Wäj bi gwani ngindenga! Lima gwuji gay gidi Gayin, lima büdädi lima i'di kora gidi gur gani Balam gani linynyi bileng. Lima dudi lima ru nono guru gani Koora gwani nyurtanu gwüngün.

¹² Ngwüji ngwee ngwübir'tängidinä ngwa'ti je yaaru apu 'di yooko nda le emadi gwüpäng kiny ge'te pu giyi'rinyinä yalu. Ngindenga liru ngwoo'ra ngwitädi giyigo'ro yegen 'dogo. Ngindenga liru nono gibä'rü gapu dirun ga'ti nu giranyu. Ngindenga liru nono ngwa'ri digadu de ngwa'ti 'ri'ru a je ngwüji aku. Aar ru nono ngwa'ri ngwayu yomonanu rom ngwug-wallanalu aar gätini mbüny.

¹³ Ngindenga liru nono dudu daru giyaanu, aar allijaja ngwuduwalu ngwegen mbüny aar ngwe

apiyi ngwüjü yaaru. Ngindenga liru nono yuur-
rumu yanni yidudu yige'ta je Ngwaalu, ji gwegen
gwuru dirim dümnänü 'tì'tin didi gwur'taling.

¹⁴ Agunug gwanni gwuru gi'ra kwo'ra tä'rìl (7)
kilinge gidi Adam, gwallija yijirä ngwüji ngwee
ngwari, “Lingidär ndi ari Deleny ndo dindäär
ngwüji ngwe ngwüngün gwanni ngwuju'ru
ngwuru ngwüü'ri (1,000) na ngwüü'ri (1,000),

¹⁵ ndi pici ngwüjü yelenya 'dar ngwudi didlä
ngwuje määtä 'dar gwanni gwuki drü gwani
apepe gwegen 'dar gwanni gwuki drü gwanni
gwärräär gay ge gidi drü danni diki, na gwani
yi'ral 'dar yanni yiki drü yondijaja je ngwüji
nono gwanni gwuki drü.”

¹⁶ Ngwüji ngwee ngwäbänginü giyenenanu aar
ke yi'rinya. Ngwugwuju ami'rang gwanni gwuki
gwudi yigor yegen 'dogo. Ngwati piyi yigo'ro
yegen aar mami'ri ngwüjänü ngwuja'ri ngwe aar
gu mbojaji.

Lurnidi nje nunnu ar or'temaji

¹⁷ A be lani ngwumaad ngwüny, diwayinar
ngwuja'ri gwanni ngwondaja ngwe ngwoo'ra
ngwükääär je ngwudi Deleny dege dani Yicu
Kirictu.

¹⁸ Lica je ndi ari, “Gaji gidi gwodaning ga ji gila
ngwüji ngwa ji gwanni ngwa ru ngwü'dü'dinyä
ngwa gwuji ami'rang gwudi yigor yegen gwuki
drü.”

¹⁹ Ngwüji ngwuru ngwee gwanni ngwata
je gäbici ngaa ü'ri'tidänü, gwanni ngwati
gwuji ubinganu gwudi lingeno 'dogo aar erne
Ligi'rämä lidi Ngwaalu.

20 A be nga nga lani ngwumaad ngwüny, üdädär yigo'ro yalu ndi ämnï Ngwaalu gwalu gwanni gwuju'rana ngaa otaci Ngwaalingalu yiima ye yidi Ligï'rim lanni Liju'ru.

21 Ngaa arngani yigo'ro yalu ndi ämnï Ngwaalinga ngaa dünïci inäng gwudi Deleny dege dani Yicu Kirictu ndi ara je olatiyi ndi mididi gwudi gwur'taling.

22 Ara je inä loko lanni gilo lümimänü.

23 Äbärär je loko giligä ngaa je gilängidiyi. Ara je inä loko ngaa be arngani yigo'ro yalu ara je yedeny eny 'di ngwured ngwanni ngwuma je ngwanginu ngwegen rngiyi.

Deelnga didi näji

24 Ngwaalu ngwuru ngwätï yiima ndi ara je dege'daji ndi i'di nunnu aji ara je olatiyi ngwäyanü ndi näji gwüngün lijaw nono lijayanu gwulleney.

25 Ngwaalu ngwe'te pu ngwuru Gilang gwege a gu näji na yur'tu na yiima na yeleny yüngün ru Deleny de dege dani Yicu Kirictu 'tu'tu gaji 'dar gwerre na gweneno 'di aar gu ele gwur'tal. Yiru gu.

Laro Bible (Bible)
Laro NT

copyright © 2020 Wycliffe Bible Translators, Inc.

Language: (Laro)

Contributor: ECS Diocese of Khartoum Translation Department

This text box needs to have content for PT9 to upload is to the DBL.
All rights reserved.

2020-11-19

PDF generated using Haiola and XeLaTeX on 25 Aug 2024 from source
files dated 29 Jan 2022

80c639f7-4569-5ffa-a77d-5df4c223631f